

Fusiuns da vischnancas in cuntrapaïs»

■ (anr/fa) Il svilup economic en Grischun è stà ils ultims onns per parts dal chantun mo pitschen. Per meglierar quel èn dumandadas a l'avis da Hans Peter Michel l'economia, la politica ed era la populaziun.

Sch'ins analisescha il svilup economic dals ultims onns en Grischun vesan ins, sco che ha ditg il president dal cussegl grond Hans Peter Michel mardi a chaschun da ses pled d'avertura, trais svilups: «Territoris cun ina colliaziun cun la Bassa e cun il Tessin han profità economicamain, destinaziuns turisticas fermas han stagnà, ed en il rest èn idas a perder piazzas da lavur ed il dumber da la populaziun residenta s'ha diminui, era causa che fitg bleras persunas giuvnas han bandunà lur valladas.»

Tge far en questa situaziun?

A l'avis da Michel avess la politica da stgaffir bunas cundiziuns generalas per l'economia, perquai che mo in'economia ferma geneschia entradas e piazzas da lavur: «Ins duess rinforzar las grondas firmas existentas e mantegnair las bleras interpresas pitschnas e mesaunas en chantun, ed alura promover la furmaziun e la prescrutaziun, il sport e la cultura, l'agricultura ed il turissem.» Ina pussaivladad da franar la depopulaziun èn tenor Michel las fusiuns da vischnancas a centers



Il parsura dal cussegl grond Hans Peter Michel.

LQ

cun gronda surfatscha che poschian a la populaziun residenta «cundiziuns da viver, da scolaziun e da lavur modernas». L'economia sezza è tenor el dumandada da tractar cun precauziun las ressursas ch'èn avant maun: «Sch'ella fa quai n'èn l'economia, l'ecologia ed in agir cun senn da responsablidad social betg pli cuntrasts, mabain la basa per in'exi-

stenza a lunga vista.» Ch'er il cumportament da la populaziun saja in factur decisiv, ha menziunà il president dal cussegl grond, «mo sch'i gartegia en avegnir meglier da metter enavos en dumondas impurtantas l'avantatg persunal da curta durada envers il profit da lunga durada per la generalitad, alura vegn franada, reducida la tendenza separatistica.»